



Terenga 3: Hōtaka 25 - Whakataurite 3

He Mihi

E te tī, e te tā, mai i te hiku o te ika a Māui ki te punga o te waka a Māui, whiti atu ki Rēkohu, whakapiri mai ki te whare o Ako. Ko te terenga tuatoru tēnei o tō tātou waka ki runga i ngā aratuku o Te Reo. Ko tātou hei kaihoe, hei kaiwhakaterere anō hoki mō tō tātou waka. Nau mai.

Hei Mahi Whakarongo

Ka whakawhiti atu tātou ki te whakarongo ki ngā whakamārama a Hone Kaa ki te whakataukī rongonui hei akiaki i te tangata. Anei ā tātou pātai:

- 1) Ko wai mā e akiakihia ana e ia?
- 2) He aha tana whakatūpatotanga ki te mana?
- 3) He aha tana pānga ki te kura o Wikitōria

He Whakamārama

Anei ētehi atu kupu hei whakatauriterite.

Anō / Me he

Ka tū ngā kupu nei ki te tīmatanga o te rerenga whakataurite, ki waenganui rānei. Tirohia ēnei tauira e kite ai koe i te whakatakatoranga mō tēnā, mō tēnā.

1. Anō he tīrairaka! Kāore e āta tau te noho.
2. Anō ko Kōpū e mahuta ake ana i te pae.
3. Me he arewhana e hīkoi ana. Inā te kaha o te haruru o te papa.
4. Me he manu tīoriori o te wao tapu a Tāne.

I roto i ngā tauira o runga ake nei, anei ngā mea e whakatauritehia ana:

1. He tangata kaha ki te oreore me te tīrairaka.
2. He tangata ātaahua me te whetū Kōpū.
3. He tangata waewae taumaha me te arewhana.
4. He tangata reka te reo waiata me te manu.

Hei Mahi

Whakamāoritia ēnei rerenga. Whakamahia ngā kupu whakataurite o te rā nei:

1. You're like Beyonce when you sing. (Anō)
2. He's like Sonny Bill when he plays rugby. (Anō)
3. When you smile, you're like a rainbow. (me he)
4. When you get angry, your voice is like thunder. (me he)

He Whakautu:

1. Anō ko Beyonce, i a koe ka waiata.
2. Anō ko Sonny Bill, i a ia e tākaro whutupōro ana.
3. Ka menemene ana koe, me he āniwaniwa.
4. Ka puku ana tō rae, me he whatitiri i te rangi tō reo.